

神农本草经

目录

上卷.....	01
中卷	
玉石部上品.....	03
玉石部中品.....	06
玉石部下品.....	08
草部上品.....	10
草部中品.....	17
草部下品.....	24
木部上品.....	31
木部中品.....	34
木部下品.....	36
下卷	
虫兽部上品.....	39
虫兽部中品.....	42
虫兽部下品.....	45
果菜部上品.....	48
果菜部中品.....	50
果菜部下品.....	51
米谷部上品.....	52
米谷部中品.....	53
米谷部下品.....	54

神农本草经上卷

上药一百二十种为君，主养命以应天，无毒，多服久服不伤人，欲轻身益气不老延年者，本《上经》。

中药一百二十种为臣，主养性以应人，无毒，有毒，斟酌其宜，欲遏病补虚羸者，本《中经》。

下药一百二十种为君，主治病以应地，多毒，不可久服，欲除寒热邪气、破积聚、愈疾者，本《下经》。

药有君臣佐使，以相宣摄合和者，宜用一君二臣五佐，又可一君三臣九佐使也。

药有阴阳配合，子母兄弟，根茎花实草石骨肉。有单行者，有相须者，有相使者，有相畏者，有相恶者，有相反者，有相杀者。凡此七情和合视之，当用相须相使良者，勿用相恶相反者。若有毒宜制，可用相畏相杀者，不尔，勿合用也。药有酸咸甘苦辛五味，又有寒热温凉四气及有毒无毒，阴干暴干，采治时日，生熟，上地所出，真伪陈新，并各有法。

药性有宜丸者，宜散者，宜水煮者，宜酒浸者，宜膏煎者，

亦有一物兼宜者，亦有不可入汤酒者，并随药性，不得违越。

凡欲治病，先察其源，先候病机。五脏未虚，六腑未竭，血脉未乱，精神未散，服药必活。若病已成，可得半愈。病势已过，命将难全。

若用毒药疗病，先起如黍粟，病去及止。不去，倍之；不去，十之。取去为度。治寒以热药，治热以寒药。饮食不消，以吐下药。鬼注蛊毒，以毒药。痈肿疮瘤，以疮药。风湿，以风湿药。各随其所宜。

病在胸膈以上者，先食后服药。病在心腹以下者，先服药而后食。病在四肢血脉者，宜空腹而在旦。病在骨髓者，宜饱满而在夜。

夫大病之主，有中风、伤寒、温症、中恶、霍乱、大腹、水肿、肠澼下利、大小便不通、贲肿、上气、咳逆、呕吐、黄疸、消渴、留饮、癖食、坚积癥瘕、惊邪、癰病、鬼注、喉痹、齿痛、耳聋、目盲、金创、踣折、痈肿、恶疮、痔、瘰、瘰瘻、男子五劳七伤、虚乏羸瘦，女子带下、崩中、血闭，虫蛇蛊毒所伤，此皆大略，宗兆。其间变动枝节，各宜依端绪以取之。

神农本草经中卷

玉石部上品

玉泉味甘平。主治五脏百病。柔筋强骨、安魂魄、长肌肉、益气，久服耐寒暑，不饥渴，不老神仙。人临死服五斤，死三年色不变。一名玉札。

丹沙味甘微寒。治身体五脏百病。养精神、安魂魄、益气、明目，杀精魅邪恶鬼。久服通神明不老。能化为汞。生山谷。

水银味辛寒。主治疥瘙痂疡百秃，杀皮肤中虫虱，堕胎，除热。杀金银铜锡毒，熔化还复为丹。久服神仙不死。生平土。

空青味甘寒。主治青盲、耳聋。明目，利九窍，通血脉，养精神。久服轻身延年不老。能化铜铁铅锡作金。生山谷。

曾青味酸小寒。主治目痛，止泪出，风痹，利关节，通九窍，破癥瘕积聚。久服轻身不老。能化金铜。生山谷。

白青味甘平。主明目，利九窍，耳聋，心下邪气。令人吐，杀诸毒三虫。久服通神明，轻身延年不老。生山谷。

云母味甘平。主治身皮死肌，中风寒热如在车船上，除邪气，安五脏，益子精，明目，轻身延年。一名云珠，一名云华，一名云英，一名云液，一名云沙，一名鳞石。生山谷。

朴消味苦寒无毒。主治百病，除寒热邪气，逐六腑积聚、结固留癖。能化七十二种石。炼饵服之，轻身神仙。生山谷。消石味苦寒。主治五脏积热，胃胀闭。涤去畜结饮食，推陈致新，除邪气。炼之如膏，久服轻身。一名芒硝。生山谷。

矾石味酸寒。主治寒热泄利，白沃阴蚀，恶疮目痛，坚骨齿。炼饵服之，轻身不老增年。一名羽涅。生山谷。

滑石味甘寒。主治身热泄澼，女子乳难，癰闭。利小便，荡胃中积聚寒热，益精气。久服轻身、耐饥，长年。生赭阳山谷。

紫石味甘平。主治心腹欬逆邪气，补不足，女子风寒在子宫，绝孕十年无子。久服温中、轻身、延年。生太山山谷。

白石英味甘微温。主治消渴，阴痿不足，欬逆，胸膈间久寒。益气，除风湿痹。久服轻身、长年。生山谷。

青石赤石黄石白石黑石脂等味甘平。主治黄疸、泄利、肠澼脓血、阴蚀、下血赤白、邪气、痈肿、疽痔恶疮、头疡、疥瘙。久服补髓益气，肥健，不饥，轻身，延年。五石脂，各随五色补五脏。生山谷。

太一禹余粮味甘平。主治咳逆上气、癥瘕、血闭、漏下，除邪气。久服耐寒暑不饥，轻身飞行千里神仙。一名石脑。生山谷。

禹余粮味甘寒。主治咳逆、寒热、烦满，下利赤白，血闭癥家大热。炼饵服之，不饥、轻身、延年。生池泽。

雄黄味苦平。主治寒热鼠痿，恶疮疽痔，死肌，杀精物恶鬼邪气百虫毒，胜五兵。炼食之，轻身神仙。一名黄食石。生山谷。

玉石部中品

石胆味酸小寒。主明目目痛，金创诸痢瘕，女子阴蚀痛，石淋寒热，崩中下血，诸邪毒气，令人有子。炼饵服之不老，久服增寿神仙。能化铁为铜、成金银。一名毕石，生山谷。

石钟乳味甘温。主治咳逆上气，明目益精，安五脏，通百节，利九窍，下乳汁。生山谷。

雌黄味辛平。主治恶疮头秃痂疥，杀毒虫，身痒，邪气，诸毒。炼之久服，轻身、增年、不老。生山谷。

殷孽味辛温。主治烂伤瘀血，泄利寒热，鼠痿，癥瘕结气。一名姜石。生山谷。

孔公孽味辛温。主治伤食不化，邪结气，恶疮疽痿痔，利九窍，下乳汁。生山谷。石流黄味酸温有毒。主治妇人阴蚀，疽痔恶血，坚筋骨，除头秃，能化金银铜铁奇物。生山谷中。

阳起石味酸无毒。主治崩中漏下，破子藏中血，癥瘕结气，寒热腹痛，无子，阴痿不起，补不足。一名白石。生奇山山谷。

凝水石味辛寒。主治身热，腹中积聚邪气，皮中如火烧，烦满。水饮之。久服不饥。一名白水石。生山谷。

慈石味辛寒。主治周痹风湿，支节中痛，不可持物，洗洗酸痛，除大热烦满及耳聋。一名玄石。生山谷。

理石味辛寒。主治身热，利胃解烦，益精明目，破积聚，去三虫。一名立制石。生山谷。长石味辛寒。主治身热，四肢寒厥，利小便，通血脉，明目去翳，眇，去三虫，杀蛊毒。久服不饥。一名方石。生山谷。

肤青味辛。主治蛊毒，毒蛇，菜肉諸毒，恶创。一名推青。生山谷。

铁落味辛平。主治风热恶创，疡疽创痂疥，气在皮肤中。铁，主坚肌耐痛。铁精主明目化铜。生平泽。

玉石部下品

石膏味辛微寒。主治中风寒热，心下逆气惊喘，口干舌焦不得息，腹中坚痛，除邪鬼，产乳，金创。生山谷。

青琅玕味辛平。主治身痒、火创、痛伤、疥瘙、死肌。一名石珠。生平泽。

礞石味辛有毒。主治寒热鼠瘻，蚀疮、死肌、风痹，腹中坚，邪气，除热。一名青分石，一名立制石，一名固羊石。生山谷。

代赭味苦寒。主治鬼注、贼风、蛊毒，杀精物恶鬼，腹中毒邪气，女子赤沃漏下。一名须丸。生山谷。

卤咸味苦咸寒。主治大热，消渴，狂烦，除邪，及吐下蛊毒，柔肌肤。大盐，令人吐。戎盐，明目，目痛，益气，坚肌骨，去蛊毒。生池泽。

白垩味苦温。主治女子寒热瘕瘕、月闭、积聚、阴肿痛，漏下，无子。生山谷。

铅丹味辛微寒。主治咳逆胃反，惊痫癫疾，除热下气。炼化还成九光。久服通神明。生平泽。

粉锡味辛寒。主治伏尸毒螫，杀三虫。锡铜镜鼻，主治女子血闭，癥瘕伏肠，绝孕。一名解锡。生贵阳山谷。

石灰味辛温。主治痈疡疥瘙，热气，恶疮癩疾，死肌堕眉，杀痔虫，去黑子息肉。一名恶灰。生山谷。

冬灰味辛微温。主治黑子，去疣息肉，疽蚀疥瘙。一名藜灰。生川泽。

草部上品

青芝味酸平。主明目，补肝气，安精魂，仁恕。久食轻身不老，延年神仙。一名龙芝。生山谷。

赤芝味苦平。主治胸中结，益心气，补中，增智慧，不忘。久食轻身不老，延年神仙。一名丹芝。生山谷。

黄芝味甘平。主治心腹五邪，益脾气，安神，忠信和乐。久食轻身不老，延年神仙。一名金芝。生山谷。白芝味辛平。主治咳逆上气，益肺气，通利口鼻，强志意勇悍，安魄。久食轻身不老，延年神仙。一名玉芝。生山谷。

黑芝味咸平。主治癰，利水道，益肾气，通九窍，聪察。久食轻身不老，延年神仙。一名玄芝。生山谷。

紫芝味甘温。主治耳聋，利关节，保神，益精气，坚筋骨，好颜色。久食轻身不老，延年神仙。一名木芝。生山谷。

天门冬味苦平，主治诸暴风湿偏痹，强骨髓，杀三虫，去伏尸。久服轻身益气延年。一名颠勒。生山谷。

术味苦温。主治湿痹、死肌、痼疸，止汗除热，消食，化煎饬。久服轻身、延年不饥。一名山蓟。生郑山山谷。委萎味

甘平。主治中风暴热不能动摇，跌筋结肉，诸不足，久服去面黧，好颜色润泽，轻身不老。生川谷。

干地黄味甘寒。主治折跌绝筋伤中，逐血痹，填骨髓，长肌肉。做汤，除寒热积聚，除痹。生者尤良。一名地髓。生川泽。

菖蒲味辛温。主治风寒湿痹，咳逆上气，开心孔，补五脏，通九窍，明耳目，出音声。久服轻身，不忘，不迷惑，延年。一名昌阳。生池泽。

远志味苦温。主治咳逆伤中，补不足，除邪气，利九窍，益智慧，耳目聪明，不忘，强智倍力。久服轻身不老。叶名小草。一名萋绕，一名细草。生川谷。

泽泻味甘寒。主治风寒湿痹，乳难，消水，养五脏，益气力，肥健。久服耳目聪明，不饥，延年轻身，面生光，能行水上。一名水泻，一名芒芋，一名鹄泻。生池泽。

薯蓣味甘小温。主治伤中，补虚羸，除寒热邪气，补中益气力，长肌肉。久服耳目聪明，轻身不饥延年。一名山芋。生山谷。

菊华味苦平。主治风头，头眩肿痛，目欲脱，泪出，皮肤死饥，恶风湿痹。久服利血气，轻身耐老延年。一名节华。生川泽。

甘草味甘平。主治五臟六腑寒熱邪氣，堅筋骨，長肌肉，倍力，金創，瘡，解毒，久服輕身延年。生川谷。

人參味甘小寒。主補五臟，安精神，定魂魄，止驚悸，除邪氣，明目，開心益智。一名人衙，一名鬼蓋。生山谷。

石斛味甘平。主治傷中，除痺下氣，補五臟虛勞羸瘦，強陰。久服厚腸胃，輕身延年。一名林蘭。生山谷。

石龍芮味苦平。主治風寒濕痺，心腹邪氣，利關節，止煩滿。久服輕身明目不老。一名魯果能，一名地榭。生川澤。

牛膝味苦（酸）平。主治寒濕痿痺，四肢拘攣，膝痛不可屈伸，逐血氣，傷熱火爛，墮胎。久服輕身耐老。一名石倍。生川谷。

獨活味苦平無毒。主治風寒所出，金創，止痛，賁豚痢瘕，女子疝瘕。久服輕身耐老。一名羌活，一名羌青，一名護羌使者。生川谷。升麻味甘平。主解百毒，殺百精老物殃鬼，辟溫疫瘴邪蟲毒。久服不夭，輕身長年，一名周升麻。生山谷。

芡胡味苦平。主治心腹腸胃中結氣、飲食積聚、寒熱邪氣，推陳致新，久服輕身、明目、益精。一名地薰。生川谷。

防葵味辛寒。主治疝瘕腸泄，膀胱熱結溺不下，咳逆，溫疟，癰痢，驚邪狂走。久服堅骨髓，益氣輕身。一名梨蓋。生川谷。

著实味苦平。主治阴痿、益气，充肌肤，明目聪慧先知。久服不饥、不老轻身。生川谷。

菴闾子味苦小温无毒。主治五脏瘀血，腹中水气，胛胀留热，风寒湿痹，身体诸痛。久服轻身延年不老。生川谷。

薏苡人味甘微寒。主治筋急拘挛不可屈伸，风湿痹，下气。久服轻身益气。其根下三虫。一名解蠡。生平泽。

车前子味甘寒无毒。主治气癰，止痛、利水道小便，除湿痹。久服轻身耐老。一名当通。生平泽。

析蓂子味辛酸温无毒。主明目，目痛泪出，除痹补五脏，益精光。久服轻身不老。一名蔑析，一名大藪，一名马辛。生山泽。

充蔚子味辛微温。主明目益惊，除水气。久服轻身。茎，主癰疹痒，可作汤浴。一名益母，一名益明，一名大札。生池泽。

木香味辛温。主治邪气，辟毒疫温鬼，强志，主淋露。久服不梦寤廌寐。生山谷。龙胆味苦涩。主治骨间寒热，惊痫邪气，续绝伤，定五脏，杀蛊毒。久服益智不忘，轻身耐老。一名陵游。生山谷。

菟丝子味辛平。主续绝伤，补不足，益气力，肥健。汁，去面黥。久服明目轻身延年。一名菟芦。生山谷。

巴戟天味辛微温。主治大风邪气，阴痿不起。强筋骨，安五脏，补中，增志，益气。生山谷。

白莫味甘寒。主治寒热、八疸、消渴。补中益气。久服轻身延年。一名穀菜。

白蒿味甘平。主治五脏邪气，风寒湿痹，补中益气，长毛发令黑，疗心悬，少食常饥。久服轻身，耳目聪明，不老。生川泽。

地肤子味苦寒。主治膀胱热，利小便，补中益精气。久服耳目聪明，轻身耐老。一名地葵。生平泽。石龙芻味苦微寒。主治心腹邪气，小便不利，淋闭。风湿鬼注恶毒。久服补虚羸，轻身，耳目聪明，延年。一名龙须，一名草续断。生山谷。

落石味苦温。主治风热死肌，痛伤，口干舌焦，痛肿不消，喉舌肿，水浆不下。久服轻身明目，润泽好颜色，不老延年。一名石鲮，生川谷。

黄连味苦无毒。主治热气，目痛眦伤泣出，明目，肠澼腹痛下利，妇人阴中肿痛。久服令人不忘。一名王连，生川谷。（亦贴生于树木或墙壁上）

王不留行味苦平。主治金创，止血、逐痛，出刺，除风痹内寒。久服轻身耐老增寿。生山谷。蓝实味苦寒。主解诸毒，杀虫蚊注鬼螫毒。久服头不白，轻身。生平泽。（靛花，即青黛）

景天味苦酸平。主大热火疮，身热烦，邪恶气。华，主女人漏下赤白，轻身明目。一名戒火，一名慎火。生川谷。

天名精味甘寒。主疗瘀血血瘕欲死，下血，止血，利小便，除小虫，去痹，除胸中结热，止烦渴。久服轻身耐老。一名麦句姜，一名虾蟆蓝，一名豕首。生川泽。（又名地菰，子名鹤虱，根名吐牛膝）

蒲黄味甘平，主治心腹膀胱寒热，利小便，止血，消瘀血。久服轻身，益气力，延年神仙。生池泽。

香蒲味甘平，主治五脏心下邪气，口中烂臭，坚齿、明目、聪耳。久服轻身耐劳。一名。生池泽。

兰草味辛平。主利水道，杀蛊毒，辟不祥。久服益气、轻身、不老，通神明。一名水香。生池泽。

决明子味咸平。主治青盲，目淫肤赤白膜，眼赤痛泪出。久服益精光轻身。生川泽。

云实味辛小温。主泄利肠澼，杀虫蛊毒，去邪恶结气，止痛，除寒热。华，主治见鬼精物。多食令人狂走。久服轻身，通神明。生川谷。（又名员实、天豆、云英）

黄芪味甘微温。主痈疽久败疮，排脓止痛，大风癰疾，五痔鼠瘻，补虚，小儿百病。一名戴糝。生山谷。

蛇床子味苦平。主治妇人阴中肿痛，男子阴漏，湿痒，除痹气，利关节，癰痼恶疮。久服轻身。一名蛇栗，一名蛇米。生川谷。

漏芦味苦咸寒。主治皮肤热，恶疮疽痔，湿痹，下乳汁。久服轻身益气，耳目聪明，不老延年。一名野兰。生山谷。

茜根味苦寒。主治寒湿风痹，黄疸。补中。生山谷。

旋华味甘温。主益气，去面黥黑色，媚好。根，主腹中寒热邪气，利小便。久服不饥轻身。一名筋根华，一名金沸。生平泽。

白兔藿味苦平。主治蛇虺蜂蛰猢猻狗菜肉蛊毒，鬼注。一名白葛。生山谷。

青蘘味甘寒。主治五臟邪气，风寒湿痹，益气，补脑髓，坚筋骨。久服耳目聪明，不饥、不老、增寿。巨胜苗也。（即胡麻之苗）生川谷。

当归味甘温无毒。主治欬逆上气，温疟热洗洗在皮肤中，妇人漏下绝子诸恶疮疡，金创，主饮之。一名乾归。生川谷。

草部中品

赤箭味辛温。主杀鬼精物，蛊毒恶气。久服益气力，长阴，肥健，轻身增年。一名离母，一名鬼督邮。生川谷。

麦门冬味甘平。主治心腹结气，伤中伤饱，胃络脉绝，羸瘦短气。久服轻身、不老、不饥。生川谷。

卷柏味辛平。主治五脏邪气，女子阴中寒热痛，癥瘕，血闭，绝子。久服轻身、和颜色。一名万岁。生山谷。

肉松容味咸。主治五劳七伤，补中，除茎中寒热痛，养五脏，强阴，益精气，多子，妇人癥瘕。久服轻身。生山谷。

蒺藜子味苦温。主治恶血，破癥结积聚喉痹，乳难。久服长肌肉，明目轻身。一名旁通，一名屈人，一名止行，一名豺羽，一名升推。生平泽。

防风味甘温无毒。主治大风眩痛，恶风邪，目盲无所见，风行周身，骨节疼痛，烦满。久服轻身。一名铜芸。生川泽。

沙参味苦微寒无毒。主治血积惊气，除寒热，补中益肺气。久服利人。一名知母。生川谷。

芎藭味辛温无毒。主治中风入脑头痛，寒痹筋挛缓急，金创，妇人血闭无子。生山谷。

麋芜味辛温。主治欬逆，定惊气，辟邪恶，除蛊毒鬼注，去三虫。久服通神。一名薇芜。

续断味苦微温。主治伤寒，补不足，金创痈伤折跌，续筋骨，妇人乳难。久服益气力。一名龙豆，一名属折。生山谷。

茵陈蒿味苦无毒。主治风湿寒热邪气，热结黄疸。久服轻身、益气、耐老。生太山及丘陵坡岸上。

五味味酸温。主益气、咳逆上气，劳伤羸瘦，补不足，强阴，益男子精。生山谷。

秦艽味苦平。主治寒热邪气，寒湿风痹肢节痛，下水利小便。生山谷。

黄芩味苦平。主治诸热黄疸，肠澼泄利，逐水，下血闭，恶疮疽蚀，火疡。一名腐肠。生山谷。芍药味苦。主治邪气腹痛，除血痹，破坚积寒热疝瘕，止痛，利小便，益气。生山谷。

干姜味辛温。主治胸满咳逆上气，温中、止血，出汗，逐风湿痹，肠澼下利，生者尤良。久服去臭气，通神明。生山谷。

蒿本味辛微温。主治妇人疝瘕，阴中寒肿痛，腹中急，除风头痛，长肌肤，悦颜色。一名鬼卿，一名地新。生山谷。

麻黄味苦温无毒。主治中风伤寒头痛，温疟，发表出汗，去邪热气，止欬逆上气，除寒热，破癥坚积聚。一名龙沙。生山谷。

葛根味甘平。主治消渴，身大热，呕吐，诸痹，起阴气，解诸毒。葛谷，主下利十岁以上。一名鸡齐根。生川谷。知母味苦寒无毒。主治消渴热中，除邪气，肢体浮肿，下水，补不足，益气。一名母蛄、连母、野蓼、地参、水参、水浚、货母。生川谷。

贝母味辛平。主治伤寒烦热，淋沥、邪气、疝瘕，喉痹，乳难。金疮风痉。一名空草。

栝楼味苦寒。主治消渴，身热烦满，大热。补虚安中，续绝伤。一名地楼。生川谷及山阴。

丹参味苦微寒无毒。主治心腹邪气，肠鸣幽幽如走水，寒热积聚，破癥除瘕，止烦满，益气。一名却蝉草。生山谷。

玄参味苦微寒无毒。主治腹中寒热积聚，女子产乳余疾。补肾气，令人目明。一名重台。生川谷。苦参味苦寒。主治心腹结气，疝瘕积聚，黄疸，溺有余沥，逐水，除痈肿。补中，明目止泪。一名水槐，一名苦蕒。生山谷及田野。

狗脊味苦平。主腰背强，关机缓急，周痹，寒湿膝痛。颇利老人。一名百枝。生川谷。

萆薢味苦平。主治腰背痛强，骨节风寒湿周痹。恶疮不瘳，热气。生山谷。

通草味辛平。主去恶虫，除脾胃寒热，通利九窍血脉关节，令人不忘。一名附支。生山谷。

瞿麦味苦寒。主治关格诸癰结，小便不通，出刺，决痈肿，明目去翳，破胎堕子，下闭血。一名巨句麦。生川谷。

败酱味苦平。主治暴热火疮，赤气，疥瘙疽痔，马鞍，热气。一名鹿肠。生川谷。

白芷味辛温。主治女人漏下赤白，血闭，阴肿，寒热，风头，侵目泪出，长肌肤、润泽，可作面脂。一名芳香。生川谷。

杜若味辛微温。主治胸胁下逆气，温中，风入脑户，头肿痛，多涕泪出。久服益精、明目、轻身。一名杜蘅。生川泽。

紫草味苦寒。主心腹邪气、五疸，补中益气，利九窍，通水道。一名紫丹，一名紫芙，一名地血。生山谷。

紫菀味苦温。主治咳逆上气，胸中寒热结气，去蛊毒痿痹，安五脏。生山谷。

白鲜味苦寒。主治头风，黄疸，咳逆，淋漓，女子阴中肿痛，湿痹死肌，不可屈伸，起止行步。生川谷。

薇衔味苦平。主治风湿痹，历节痛，惊痫吐舌，悸气贼风，鼠痿痈肿。一名麋衔。生川泽。

白薇味苦平。主治暴中风身热，肢满，忽忽不知人，狂惑邪气，寒热酸疼，温疟洗洗，发作有时。生川泽。

藁耳实味甘温。主治风头寒痛，风湿周痹，四肢拘挛痛，恶肉死肌。久服益气，耳目聪明，强志轻身。一名胡藁，一名地葵。生川谷。

茅根味甘寒。主治劳伤虚羸，补中益气，除瘀血，血闭寒热，利小便。其苗主下水。一名兰根，一名茹根。生山谷。

酸酱味酸平。主治热烦满，定志益气，利水道，产难，吞其实立产。一名酢酱。生川泽。淫羊藿味辛寒。主治阴痿，绝伤，茎中痛，利小便。益气力，强志。一名刚前。生山谷。

蠡实味甘平。主治皮肤寒热，胃中热气，风寒湿痹。坚筋骨，令人嗜食。久服轻身。华叶，去白虫。一名剧草，一名三坚，一名豕首。生川谷。

款冬味辛温。主治咳逆上气，善喘，喉痹，诸惊痫，寒热邪气。一名藁吾、颛东、虎虚、菟奚。生山谷。

防己味辛平。主治风寒温疟热气，诸病，除邪利大小便。一名解离。生川谷。

女菀味辛温。主治风寒洗洗，霍乱泄痢，肠鸣上下无常处，惊痫寒热百疾。生川谷。

泽兰味酸无毒。主治乳妇衄血，中风余疾，大腹水肿，身面四肢浮肿，骨节中水，金创，痈肿疮脓。一名虎兰，一名龙枣。生泽傍。

地榆味苦微寒。主治妇人乳痛，七伤，带下病，止痛，除恶肉，止汗，疗金创。生山谷。

王孙味苦平无毒。主治五脏邪气，寒湿痹，四肢疼酸，膝冷痛。生川谷。

爵床味咸寒。主治腰脊痛不得著床，俯仰艰难，除热，可作浴汤。生山谷。

马先蒿味苦平。主治寒热鬼注，中风湿痹，女子带下病，无子。一名马矢蒿。生川泽。

蜀羊泉味苦微寒。主治头秃恶疮，热气疥瘙痂癣虫，疗龋齿。生川谷。

积雪草味苦寒，主治大热，恶疮痈疽，浸淫赤燂，皮肤赤，身热。生川谷。垣衣味酸无毒。主治黄疸，心烦咳逆，血气，暴热在肠胃，金创内寒。久服补中益气，长肌，好颜色。一名昔邪，一名乌韭，一名垣羸，一名天韭，一名鼠韭。生古垣墙阴或屋上。

水萍味辛寒。主治暴热身痒，下水气，胜酒，长须发，止消渴。久服轻身。一名水华。生池泽。

海藻味苦寒。主治瘰瘤气，颈下核，破散结气，痈肿，癥瘕坚气，腹中上下鸣，下十二水肿。一名落首。生池泽。

桔梗味苦无毒。主治胸胁痛如刀刺，腹满肠鸣幽幽，惊恐悸气。生山谷。

旋覆花味咸温。主治结气，胁下满，惊悸，除水，去五脏间寒热。补中下气。一名金沸草，一名盛湛。生川谷。

蛇全味苦微寒。主治惊痫寒热邪气，除热，金创，疽痔鼠痿，恶疮头疡。一名蛇衔。生山谷。

假苏味辛温。主治寒热鼠痿瘰癧生疮，破结聚气，下瘀血，除湿痹。一名鼠莫。生川泽。

草部下品

营实味酸温。主治痈疽恶疮，结肉跌筋，败疮热气，阴蚀不瘳，利关节。一名墙薇，一名墙麻，一名牛棘。生山谷。

牡丹味辛寒。主治寒热中风，痙痲瘖，惊痫邪气，除癥坚，瘀血，留舍肠胃，安五脏，疗痈疮。一名鹿韭，一名鼠姑。生山谷。

石韦味苦平。主治劳热邪气，五癃闭不通，利小便水道。一名石樨。生山谷石上。

百合味甘平。主治邪气腹胀心痛，利大小便。补中益气。生川谷。

紫参味苦寒。主治心腹积聚，寒热邪气，通九窍，利大小便。一名牡蒙。生山谷。

王瓜味苦寒。主治消渴内癰，瘀血月闭，寒热酸疼，益气愈聋。一名土瓜。生平泽。

大黄味苦寒有毒。主下瘀血，血闭，寒热，破癥瘕积聚，留饮宿食，荡涤肠胃，推陈致新，通利水谷，调中化食，安和五脏。生山谷。

甘遂味苦寒有毒。主治大腹疝瘕，腹满，面目浮肿，留饮宿食，破癥坚积聚，利水谷道。一名主田。生川谷。

亭历味辛寒。主治癥瘕积聚结气，饮食寒热，破坚逐邪，通利水道。一名大室，一名大适。生平泽及田野。芫华味苦温有毒。主治欬逆上气，喉鸣喘，咽肿气短，蛊毒鬼疟，疝瘕痈肿，杀虫鱼。一名去水。生川谷。

泽漆味苦微寒。主治皮肤热，大腹水气，四肢面目浮肿，丈夫阴气不足。生川泽。

大戟味苦寒。主治蛊毒十二水。腹满急痛，积聚，中风，皮肤疼痛，吐逆。一名卵钜。

芩华味苦寒。主治伤寒温疟，下十二水，破积聚大坚癥瘕，荡涤肠胃中留癖饮食，寒热邪气，利水道。生川谷。

钩吻味辛温。主治金疮乳，中恶风，咳逆上气，水肿，杀鬼注蛊毒。一名治葛。生山谷。

藜芦味辛寒有毒。主治蛊毒，咳逆，泄痢肠澼，头疡疥瘙恶疮，杀诸虫毒，去死肌。一名黄蓍。生山谷。

乌头味辛温有毒。主治中风恶风洗洗，出汗，除寒湿痹，咳逆上气，破积聚寒热。其汁煎之，名射罔，杀禽兽。一名奚毒，一名即子，一名乌喙。生山谷。

天雄味辛温。主治大风，寒湿痹，历节痛，拘挛缓急，破积聚，邪气，金创，强筋骨，轻身健行。一名白幕。生山谷。

附子味辛温有毒。主治风寒咳逆邪气，温中，金创，破癥坚积聚，血瘀寒湿，踠臂拘挛，膝痛不能行走。生山谷。

羊躑躅味辛温有毒。主治贼风在皮肤中淫淫痛，温疟，恶毒，诸痹。生川谷。茵芋味苦温。主治五脏邪气，心腹寒热羸瘦，如疟状发作有时，诸关节风湿痹痛。生川谷。

射干味苦平。主治咳逆上气，喉痹咽痛不得消息，散结气，腹中邪逆，食饮大热。一名乌扇，一名乌蒲。生川谷。

鸢尾味苦平。主治蛊毒邪气，鬼注诸毒，破癥瘕积聚，去水，下三虫。生山谷。

贯众味苦微寒有毒。主治腹中邪热气，诸毒，杀三虫。一名贯节，一名贯渠，一名百头，一名虎卷，一名扁苻。生山谷。

飞廉味苦平。主治骨节热，胫重酸疼。久服令人身轻。一名飞轻。生川泽。

半夏味辛平。主治伤寒寒热，心下坚，下气，喉咽肿痛，头眩胸胀，咳逆肠鸣，止汗。一名地文，一名水玉。生川谷。虎掌味苦温无毒。主治心痛，寒热，结气，积聚伏梁，伤筋痿拘缓，利水道。生山谷。

莨菪子味苦寒。主治齿痛，出虫，肉痹拘急，使人健行，见鬼，多食令人狂走。久服轻身。走及奔马，强志、益力、通神。一名横唐。生川谷。

蜀漆味辛平有毒。主治疟及咳逆寒热，腹中癥坚痞结，结聚邪气，蛊毒鬼注。生川谷。

恒山味苦寒。主治伤寒寒热，热发温疟，鬼毒，胸中痰结，吐逆。一名互草。生川谷。

青葙味苦微寒。主治邪气，皮肤中热，风瘙身痒，杀三虫。子名草决明，疗唇口青。一名草蒿，一鸣萎蒿。生平谷。狼牙味苦寒有毒。主治邪气热气，疥瘙恶疡疮痔，去白虫。一名牙子。生川谷。

白蔹味苦平。主治痈肿疽疮，散结气，止痛除热，目中赤，小儿惊痫，温疟，女子阴中肿痛。一名菟核，一名白草。生山谷。

白及味苦平。主治痈肿恶疮败疽，伤阴，死肌，胃中邪气，贼风鬼击，痲缓不收。一名甘根，一名连及草。生川谷。

草蒿味苦寒。主治疥瘙痂痒恶疮，杀虱，留热在骨节间，明目。一名青蒿，一名方溃。生川泽。

藿菌味咸平。主治心痛，温中，去长虫、白徙、蛲虫，蛇螫毒，癥瘕诸虫。一名藿芦。生池泽。连翘味苦平。主治寒热

鼠漏，瘰癧痛肿，恶疮癰瘤，结热蛊毒。一名异翹，一名蔞华，一名折根，一名三廉。生山谷。

白头公味苦温无毒。主治温疟狂易，寒热，癰疽积聚，瘰气，逐血止痛，疗金创。一名野丈人，一名胡王使者。生川谷。

閼茹味酸咸有毒。主蚀恶肉，败疮，死肌，杀疥虫，排脓恶血，除大风热气，善忘不乐。生川谷。

羊桃味苦寒。主治燔热身暴赤色，风水积聚，恶疡，除小儿热。一名鬼桃，一名羊肠。生川谷。

羊蹄味苦寒。主治头秃疥瘙，除热，女子阴蚀。一名东方宿，一名连虫陆，一名鬼目。生川泽。

鹿藿味苦平。主治蛊毒，女子腰腹痛不乐，肠痛瘰癧瘡气。生山谷。牛扁味苦微寒。主治身皮疮热气，可作浴汤，杀牛虱小虫，又疗牛病。生川谷。

陆英味苦寒。主治骨间诸痹，四肢拘挛疼酸，膝寒痛，阴痿，短气不足，脚肿。生川谷。

藎草味苦平。主治久咳上气，喘逆久寒，惊悸，痂疥，白秃，瘡气，杀皮肤小虫。生川谷。

夏枯草味苦辛寒。主治寒热瘰癧，鼠痿头疮，破癰，散癰结气，脚肿湿痹。轻身。一名夕句，一名乃东。生川谷。

乌韭味甘寒。主治皮肤往来寒热，利小肠、膀胱气。生山谷。

蚤休味苦微寒。主治惊痫摇头弄舌，热气在腹中，癰疾，痈疮阴蚀，下三虫，去蛇毒。一名螫休。生川谷。

石长生味咸微寒。主治寒热恶疮大热，辟鬼气不祥。一名丹草。生山谷。

狼毒味辛平。主治咳逆上气，破积聚饮食，寒热水气，恶疮鼠瘻疽蚀，鬼精蛊毒，杀飞鸟走兽。一名续毒。生山谷。

鬼臼味辛温。主杀蛊毒鬼注精物，辟恶气不祥，逐邪解百毒。一名爵犀，一名马目毒公，一名九臼。生山谷。

扁蓄味苦平。主治浸淫疥瘙疽痔，杀三虫。生山谷。

商陆味辛平。主水胀，疝瘕痹，熨除痈肿。杀鬼精物。一名根，一名夜呼。生川谷。

女青味辛平。主治蛊毒，逐邪恶气，杀鬼温疟，辟不祥。一名雀瓢。生山谷。白附子主治心痛血痹，面上百病，行药势。生蜀郡。

姑活味甘温。主治大风邪气，湿痹寒痛。九服轻身益寿耐老。一名冬葵子。生川泽。

别羈味苦微温。主治风寒湿痹，身重，四肢疼酸寒邪历节痛。生川谷。

石下长卿味咸平。主治鬼注精物，邪恶气，杀百精蛊毒，老魅注易，亡走啼哭，悲伤恍惚。一名徐长卿。生池泽。

翘根味苦寒。主治下热气，益阴精，令人面悦好，明目。久服轻身耐老。生平泽。

屈草味苦。主治胸胁下痛，邪气，肠间寒热，阴痹。久服轻身益气耐老。生川泽。

木部上品

茯苓味甘平。主治胸胁逆气，忧悲惊恐，心下结痛，寒热烦满咳逆，口焦舌干，利小便。久服安魂养神，不饥延年。一名伏兔。生山谷。

松脂味苦温。主治痈疽恶疮，头疡白秃，疥瘙风气，安五脏，除热。久服轻身延年。一名松膏，一名松肪。生山谷。

柏实味甘平。主治惊悸，安五脏，益气，除风湿痹。久服令人润泽美色，耳目聪明，不饥不老，轻身延年。生山谷。

菌桂味辛温。主治百病，养精神，和颜色，为诸药先聘通使。久服轻身不老，面生光华，媚好常如童子。生交止山谷。

牡桂味辛温。主治上气咳逆、结气，喉痹吐吸，利关节，补中益气。久服通神，轻身不老。生山谷。

杜仲味辛平。主治腰膝痛，补中，益精气，坚筋骨，强志，除阴下痒湿，小便余沥。久服轻身耐老。一名思仙。生山谷。

蔓荆实味苦微寒。主治筋骨间寒热，湿痹拘挛，明目坚齿，利九窍，去白虫。久服轻身耐老。小荆实亦等。

女贞实味苦平。主补中安五脏，养精神，除百疾。久服肥健、轻身、不老。生川谷。

桑上寄生味苦平。主治腰痛，小儿背强，痈肿，安胎，充肌肤，坚齿发，长须眉。其实，明目、轻身、通神。一名寄屑，一名寓木，一名宛童。生山谷。

苏核味甘平无毒。主治心腹邪结气，明目，目赤痛伤泪出。久服轻身、益气、不饥。生川谷。

蘼木味苦寒。主治五脏肠胃中结气热，黄疸，肠痔，止泄利，女子漏下赤白，阴阳蚀疮。根，一名檀桓。生山谷。

辛夷味辛温。主治五臟身体寒热，风头脑痛，面䟽。久服下气，轻身明目，增年能老。一名辛引，一名侯桃，一名房木。生川谷。

榆皮味甘平。主治大小便不通，利水道，除邪气。久服轻身不饥。其实尤良。一名零榆。生山谷。

酸枣味酸平。主治心腹寒热邪结气，四肢酸疼，湿痹。久服安五脏，轻身延年。生川泽。

槐子味苦寒。主治五内邪气热，止涎唾，补绝伤，五痔火疮，妇人乳瘕，子藏急痛。生平泽。

枸杞味苦寒。主治五内邪气，热中消渴，周痹。久服坚筋

骨，轻身耐老。一名杞根，一名地骨，一名枸忌，一名地辅。生平泽。

橘柚味辛温。主治胸中瘕热逆气，利水谷。久服去口臭，下气通神。一名橘皮。生南山川谷。

木部中品

干漆味辛温，无毒。主治绝伤，补中，续筋骨，填髓脑，安五脏，五缓六急，风寒湿痹。生漆，去长虫。久服轻身耐老。生川谷。

木兰味苦寒。主治身大热在皮肤中，去面热赤疱酒皴，恶风癩疾，阴下痒湿，明目。一名林兰。生山谷。

龙眼味甘平。主治五脏邪气，安志，厌食。久服强魂，聪明，轻身不老，通神明。生山谷。

厚朴味苦温无毒。主治中风、伤寒、头痛，寒热惊气，血痹死肌，去三虫。生山谷。

竹叶味苦平。主治咳逆上气，溢筋急恶疡，杀小虫。根，作汤，益气止渴，补虚下气。汁，主风痉痹。实，通神明，轻身益气。

枳实味苦寒。主治大风在皮肤中如麻豆苦痒，除寒热热结，止利。长肌肉，利五脏，益气轻身。生川泽。

山茱萸味酸无毒。主治心下邪气寒热，温中，逐寒湿痹，去三虫。久服轻身。一名蜀枣。生山谷。

吴茱萸味辛温。主温中下气止痛，咳逆寒热，除湿血痹，逐风邪，开腠理。根，杀三虫。一名藟。生川谷。秦皮味酸无毒。主治风寒湿痹，洗洗寒气，除热，目中青翳白膜。久服头不白，轻身。生川谷。

支子味苦寒。主治五内邪气，胃中热气，面赤酒疱皴鼻，白癞赤癞疮疡。一名木丹。生川谷。

合欢味甘平。主安五脏，和心志，令人欢乐无忧。久服轻身明目，得所欲。生益州山谷。

秦椒味辛温。主治风邪气，温中，除寒痹，坚齿长发，明目。久服轻身好颜色，耐老增年通神。生川谷。

紫葳味酸微寒。主治妇人乳余疾，崩中癥瘕血闭，寒热羸瘦，养胎。生川谷。

茺莢味辛。主治五内邪气，散皮肤骨节中淫淫行毒。去三虫，化食。一名无姑，一名殿塘（草头）。生川谷。

桑根白皮味甘寒。主治伤中五劳六极羸瘦，崩中脉绝，补虚益气。叶，除寒热，出汗。桑耳，黑者，主女子漏下，赤白汁，血病，癥瘕积聚腹痛，阴阳寒热，无子。五木耳，名薺榜，益气不饥，轻身强志。

木部下品

松萝味苦平。主治瞋怒邪气，止虚汗出，风头，女子阴寒肿痛。一名女萝。生山谷。

五加味辛温。主治心腹疝气，腹痛，益气，疗臂。小儿立能行，疽疮阴蚀。一名豺漆。

猪苓味甘平。主治痰疟，解毒，蛊毒、蛊注，不祥，利水道。久服轻身耐老。一名段（犬旁）猪矢。生山谷。

白棘味辛寒。主治心腹痛，痈肿溃脓止痛。一名棘鍼。生川谷。

卫矛味苦寒无毒。主治女子崩中下血，腹满汗出，除邪，杀鬼毒蛊注。一名鬼箭。

黄环味苦有毒。主治蛊毒鬼注鬼魅，邪气在藏中，除咳逆寒热。一名陵泉，一名大就。生山谷。

石南草味辛平。主养肾气，内伤阴衰，利筋骨皮毛。实，杀蛊毒，破积聚，逐风痹。一名鬼目。生山谷。

巴豆味辛温有毒。主治伤寒温疟寒热，破癥瘕结聚坚积，

留饮痰癖，大腹水脹，蕩滌五臟六腑，开通闭塞，利水谷道，去恶肉，除鬼毒蛊注邪物，杀虫鱼。一名巴椒。生川谷。

蜀椒味辛温。主治邪气咳逆，温中，逐骨节皮肤死肌，寒湿痹痛，下气。久服之头不白，轻身增年。生川谷。

莽草味辛温。主治风头，痈肿乳痈，疝瘕，除结气，疥瘙疽疮。杀虫鱼。生山谷。

郁核味酸平。主治大腹水肿，面目四肢浮肿，利小便水道。根，主治齿断肿、齩齿，坚齿。鼠李，主治寒热瘰癧疮。一名爵李。生川谷。

栞华味苦寒。主治目痛泪出伤眦，消目肿。生川谷。

蔓椒味苦温。主治风寒湿痹，历节痛，除四肢厥气，膝痛。一名豕椒。生川谷。

雷丸味苦寒。主杀三虫，逐毒气，胃中热，利丈夫，不利女子。作摩膏，除小儿百病。生山谷。

洩疏味辛寒。主治身皮肤中热，除邪气，止遗溺，可作浴汤。生川谷。药食根味辛温。主治邪气，诸痹疼酸，续绝伤，补骨髓。一名连木。（即贝母之根）生山谷。

皂荚味辛咸温。主治风痹死肌，邪气，风头泪出。利九窍，杀精物。生川谷。

练实味苦寒。主治温疾伤寒大热烦狂，杀三虫，疥痒，利小便水道。（即楝实）生山谷。

柳华味苦寒。主治风水，黄疸，面热黑。叶，主治马疥痂疮。实，主治溃痈，逐脓血。一名柳絮。生瑯邪川泽。

桐叶味苦寒。主治恶蚀疮著阴。皮，主五痔，杀三虫。华，傅猪疮，饲猪肥大三倍。生山谷。

梓白皮味苦寒。主治热，去三虫。华叶，捣傅猪疮，饲猪肥大三倍。生山谷。

淮木味苦平无毒。主治久咳上气，伤中虚羸，女子阴蚀，漏下赤白卧。一名百岁城中木。生平泽。

下卷

虫兽部上品

发髮味苦温。主治五癰关格不通，利小便水道，疗小儿痢，大人瘕，仍自还神化。

龙骨味甘平。主治心腹鬼注，精物老魅，咳逆，泄利脓血，女子漏下，癥瘕坚结，小儿热气惊痫。齿，主治小儿大人惊痫癎疾狂走，心下结气，不能喘息，诸瘕。杀精物。久服轻身通神明延年。生山谷。

牛黄味苦平。主治惊痫寒热，热甚狂瘕，除邪逐鬼。牛角鰓，下闭血，瘀血疼痛，女子带下血。髓，补中填骨髓，久服增年。胆，可丸药。生平泽。麝香味辛温。主辟恶气，杀鬼精物，温疟，蛊毒痢瘕，去三虫。久服除邪不梦寤魔寐。生川谷。

熊脂味甘微寒。主治风痹不仁筋急，五藏腹中积聚，寒热羸瘦，头秃百秃，面黥疤。久服强志不饥轻身。生山谷。

白胶味甘平。主治伤中劳绝，腰痛羸瘦，补中益气，妇人血闭无子，止痛安胎。久服轻身延年。一名鹿角胶。

阿胶味甘平。主治心腹内崩，劳极洒洒如症状，腰腹痛，四肢酸疼，女子下血，安胎。久服轻身益气。一名传致胶。

丹雄鸡味甘微温。主治女子崩中漏下，赤白沃，补虚，温中，止血通神，杀毒，辟不祥。头，主杀鬼。肪，主治耳聋。肠，主治遗溺。胝脰裹黄皮，主治泄利。屎白，主治消渴，伤寒寒热。翎羽，主下血闭。鸡子，除热火疮，痢瘕，可作虎魄神物。鸡白蠹，肥猪。生平泽。

雁肪味甘平无毒。主治风挛拘急，偏枯，气不通利。久服益气不饥，轻身耐老。一名鴈肪。生池泽。

石蜜味甘平。主治心腹邪气，诸惊痢瘕，安五藏诸不足，益气补中，止痛解毒，除众病，和百药。久服强志轻身，不饥不老。生山谷。

蜜蜡味甘微温。主治下利脓血，补中，续绝伤，金创，益气，不饥耐老。生山谷。

蜂子味甘平。主治风头，除蛊毒，补虚羸，伤中。久服令人光泽，好颜色，不老。大黄蜂子，主治心腹胀满痛，轻身益气。土蜂子，主治痈肿。一名蜚零。生山谷。

牡蛎味咸平。主治伤寒寒热，温疟洒洒，惊悸怒气，除拘缓，鼠痿，女子带下赤白。久服强骨节，杀邪鬼，延年。一名蛎蛤。生池泽。

鲤鱼胆味苦寒。主治目热赤痛，青盲，明目。久服强悍益志气。生池泽。

鱧鱼味甘寒。主治湿痹面目浮肿，下大水。一名酮鱼。生池泽。

虫兽部中品

犀角味苦寒。主治百毒蛊注，邪鬼瘴气，杀钩吻鸠羽蛇毒，除邪，不迷惑魇寐。久服轻身。生川谷。

羚羊角味咸寒。主明目益气起阴，去恶血注下，辟蛊毒恶鬼不祥，安心气，常不魇寐。久服强筋骨轻身。生川谷。羖羊角味咸温。主治青盲、明目，杀疥虫，止寒泄，辟恶鬼虎狼，止惊悸。久服安心益气轻身。生川谷。

白马茎味咸平。主治伤中脉绝，阴不起。强志益气，长肌肉，肥健生子。眼，主治惊痫腹满疟疾。悬蹄，主治惊邪瘕瘕，乳难，辟恶气鬼毒蛊注不祥。生平泽。

狗阴茎味咸平。主治伤中，阴痿不起，令强热大生子，除女子带下十二疾。胆，明目。一名狗精。生平泽。

鹿茸味甘温。主治漏下恶血，寒热惊痫，益气强志，生齿不老。角，主治恶疮痈肿，逐邪恶气，留血在阴中。伏翼味咸平。主治目瞑，明目，夜视有精光。久服令人喜乐媚好无忧。一名蝙蝠。生太山川谷。

猬皮味苦平。主治五痔阴蚀，下血赤白，五色血汁不止，阴肿痛引腰背。酒煮杀之。生川谷。

石龙子味咸寒。主治五癰，邪结气，破石淋，下血，利小便水道。一名蜥蜴。生川谷。

桑螵蛸味咸平。主治伤中，疝瘕阴痿，益精生子，女子血闭腰痛，通五淋，利小便水道。生桑枝上，采蒸之。一名蚀脐。

蚱蝉味咸寒。主治小儿惊痫，夜啼，癰病，寒热。生杨柳上。

白僵蚕味咸。主治小儿惊痫夜啼，去三虫，灭黑𦘔，令人面色好，男子阴痿病。生平泽。

木虻味苦平。主治目赤痛，眦伤泪出，瘀血血闭，寒热酸斯，无子。一名魂常。生川泽。

蜚虻味苦微寒。主逐瘀血，破下血积坚癖癥瘕寒热，通利血脉及九窍。生川谷。

蜚廉味咸。主治血瘀，癥坚寒热，破积聚，喉咽痹，内寒无子。生川泽。

蛭蟪味咸微温。主治恶血血瘀，痹，破折血在胁下坚满痛，月闭，目中淫肤，青翳白膜。一名愤螳蛭。生平泽。

蛞蝓味咸寒。主治贼风喎僻，轶筋及脱肛，惊痫挛缩。一名陵蠡。生池泽。

海蛤味苦平。主治咳逆上气，喘息烦满，胸痛寒热。一名魁蛤。生池泽。文蛤，主治恶疮，蚀五痔。

龟甲味咸平。主治漏下赤白，破癥瘕，痃疟，五痔阴蚀，湿痹，四肢重弱，小儿囟不合。久服轻身不饥。一名神屋。生池泽。

鳖甲味咸平。主治心腹癥瘕，坚积寒热，去痞、息肉，阴蚀，痔，恶肉。生池泽。

鲎鱼甲味辛微温。主治心腹癥瘕，伏坚积聚，寒热，女子崩中下血五色，小腹阴中相引痛，疥疮死肌。生池泽。

乌贼鱼骨味咸微温。主治女子漏下赤白经汁，血闭，阴蚀肿痛，寒热，癥瘕，无子。生池泽。

蟹味咸寒。主治胸中邪气，热结痛，喎僻面肿。败漆。烧之致鼠。生池泽。

虾蟇味辛寒。主治邪气，破癥坚血，痃肿阴疮。服之不患热病。生池泽。

虫兽部下品

六畜毛蹄甲味咸平。主治鬼注蛊毒，寒热，惊痫，癰瘕狂走。骆驼毛尤良。

鼯鼠主堕胎，令易产。

麋脂味辛温。主治痈肿恶疮死肌，寒风湿痹，四肢拘缓不收，风头肿气，通凑理。一名宫脂。生山谷。

豚卵味甘温。主治惊癇癰疾，鬼注蛊毒，除寒热，賁豚，五癰，邪气，挛缩。悬蹄，主治五痔，伏热在肠，肠痈内蚀。一名豚颠。

鸛屎味心平。主治蛊毒，鬼注，逐不祥邪气，破五癰，利小便。生高谷山平谷。

天鼠屎味辛寒。主治面目痈肿，皮肤洗洗时痛，腹中血气，破寒热积聚，除惊悸。一名鼠沽，一名石肝。生合浦山谷。露蜂房味苦平。主治惊痫瘈瘲，寒热邪气，癰疾，鬼精蛊毒，肠痔。火熬之良。一名蜂场。生山谷。

橐鸡味苦平。主治心腹邪气，阴痿，益精强志，生子，好色。补中轻身。生川谷。

螭虫味咸寒。主治心腹寒热洗洗，血积癥瘕，破坚，下血闭，生子大良。一名地鳖。生川泽。

水蛭味咸平。主逐恶血瘀血月闭，破血瘕积聚，无子，利水道。生池泽。

石蚕味酸无毒。主治五癰，破五淋，堕胎。肉，解结气，利水道，除热。一名沙虱。生池泽。

蛇蛻味咸平。主治小儿百二十种惊痫，瘰癧，癰疾，寒热，肠痔，虫毒，蛇病。火熬之良。一名龙子衣，一名蛇符，一名龙子单衣，一名弓皮。生山谷。吴公味辛温。主鬼注蛊毒，噉诸蛇虫鱼毒，杀鬼物老精，温疟，去三虫。生川谷。

马陆味辛温。主治腹中大坚蒸，破积聚，息肉恶疮，白秃。一名百足。生川谷。

翳螬味辛平。主治久聋，欬逆，毒气，出刺，出汗。生川谷。

雀瓮味甘平。主治小儿惊痫，寒热结气，蛊毒，鬼注。一名躁舍。

彼子味甘温。主治腹中邪气，去三虫，蛇螫，蛊毒，鬼注，伏尸。

鼠妇味酸温。主治气癰不得小便，妇人月闭血瘕，痢瘕寒

热，利水道。一名蟠贞，一名伊咸。生平谷。

萤火味辛微温。主明目，小儿火疮伤，热气，蛊毒鬼注，通神精。一名夜光。生池泽。生池泽。

衣鱼味咸温无毒。主治妇人疝瘕，小便不利，小儿中风项强，皆宜摩之。一名白鱼。生平泽。

白颈蚯蚓味咸寒。主治蛇瘕，去三虫，伏尸，鬼注蛊毒，杀长虫。仍自化作水。生平土。

蝼蛄味咸寒。主治产难，出肉中刺，溃痈肿，下哽噎，解毒，除恶疮。夜出者良。一名螻蛄，一名天蝼，一名蝥。生平泽。

蜣螂味咸寒。主治小儿惊痫瘈瘲，腹胀寒热，大人癰疾狂易。火熬之良。一名吉蜣蜋。生池泽。

蟹螯味辛寒。主治寒热鬼注蛊毒，鼠痿，恶疮，疽蚀，死肌，破石癰。一名龙尾。生川谷。地胆味辛寒。主治鬼注寒热，鼠痿恶疮，死积，破癰瘕，堕胎。一名元青。生川谷。

马刀味辛微寒有毒。主治漏下赤白，寒热，破石淋，杀禽兽贼鼠。生池泽。

贝子味咸平。主治目翳，鬼注，蛊毒，腹痛，下血，五癰，利水道。烧用之良。生池泽。

果菜部上品

蒲陶味甘平。主治筋骨湿痹，益气倍力强志，令人肥健，耐饥忍风寒。久食轻身不老延年。可作酒。生山谷。

蓬藋味酸平。主安五藏，益精气，长阴令坚，强志倍力，有子。久服轻身不老。一名覆盆。生平泽。

大枣味甘平。主治心腹邪气，安中养脾，助十二经，平胃气，通九窍，补少气少津液，身中不足，大惊，四肢重。和百药。久服轻身长年。叶覆麻黄，能令出汗。生平泽。藕实茎味甘平。主补中养神，益气力，除百疾。久服轻身耐老，不饥延年。一名水芝。生池泽。

鸡头味甘平。主治湿痹，腰脊膝痛，补中，除百疾，益精气，强志，耳目聪明。久服轻身不饥，耐老神仙。一名雁喙。生池泽。

甘瓜子味甘平。主令人悦泽，好颜色，益气不饥。久服轻身耐老。瓜蒂，味苦寒。主治大水，身面四肢浮肿，下水，杀蛊毒，欬逆上气；食诸果不消，病在胸腹中，皆吐下之。一名土芝。生平泽。冬葵子味甘寒。主治五藏六腑寒热羸瘦，破五淋，利小便。久服坚骨长肌肉，轻身延年。

菹实味甘寒。主治青盲明目，除邪，利大小便，去寒热。久服益气力，不饥轻身。一名马菹。生川泽。

苦菜味苦寒。主治五藏邪气，厌穀胃痹。久服安心益气，聪察少卧，轻身耐老。一名荼草，一名选。生川谷。

果菜部中品

櫻桃味甘平无毒。主调中，益脾气。令人好颜色，美志。

梅实味酸平。主下气，除热烦满，安心，肢体痛，偏枯不仁，死肌。去青黑志，恶疾。生川谷。

蓼实味辛温。主明目温中，耐风寒，下水气，面目浮肿，痛癢。马蓼，去肠中蛭虫。轻身。生川泽。葱实味辛温。主明目、补中不足。其茎，可作汤，主治伤寒寒热，出汗，中风面目肿。薤，味辛，主治金创创败。轻身不饥耐老。生平泽。

水苏味辛微温。主下气杀穀，辟口臭，去毒，辟恶气。久服通神明，轻身耐老。生池泽。

杏核味甘温。主治欬逆上气，雷鸣，喉痹，下气，产乳，金创，寒心，賁豚。生川谷。

果菜部下品

桃核味苦平。主治瘀血，血闭，瘕，邪气，杀小虫。桃华，杀注恶鬼。令人好颜色。桃泉，微温，杀百鬼精物。桃毛，主下血瘕，寒热积聚，无子。桃蠹，杀鬼邪恶不祥。生山谷。

苦瓠味苦寒。主治大水面目四肢浮肿，下水。令人吐。生山泽。

水蘩味甘平。主治女子赤沃，止血，养精，保血脉，益气，令人肥健嗜食。一名水英。生池泽。

米谷部上品

胡麻味甘平无毒。主治伤中虚羸，补五内，益气力，长肌肉，填脑髓。久服轻身不老。叶名青囊，一名巨胜。生川谷。

麻蕒味辛平。主治七伤，利五藏，下血寒气，多食令人见鬼狂走。久服通神明轻身。麻子，味甘平。主补中益气。久服肥健不老。一名麻勃。生川谷。

米谷部中品

大豆黄卷味甘平无毒。主治湿痹筋挛膝痛。生大豆，涂痈肿。煮汁饮，杀鬼毒，止痛。赤小豆，主下水，排痈肿脓血。生平泽。粟米味苦无毒。主养肾气，去胃脾中热，益气。陈者味苦，主治胃热，消渴，利小便。

黍米味甘无毒。主益气补中，多热令人烦。

米谷部下品

腐婢味辛平。主治疟疾寒热，邪气，泄利，阴不起，病酒头痛。